


南漢書

十一之三



			二	三	漢
			一	三	書
		三	三	四	類
二	八	五	四		
冊	架	函	號	類	

庫文閣內			
二		二	漢
九		三	書
函		一	
二	一	三	
三	二	四	
架	冊	號	類

內閣文庫	
番號	漢 2334
冊數	12 (6)
函號	290 173






南漢書卷十一

順德梁廷枏章冉撰

列傳第五

諸臣傳三



蕪二梁程二王簡鍾列傳

蕪章封州人少事烈祖爲牙將性忠厚以勇力
著乾寧初薛王知柔出鎮南海廣州將盧琚使
譚宏玘據端州境拒之章從烈宗進討伏甲舟

南漢書

卷十一

中誘殺宏玘復襲殺琚迎知柔以功奏署衙內
馬步軍都指揮使既而從征盧延昌於韶州舟
師出雙石會大霧日昏暝如夜延昌兵四出以
鐵纜繫巨鈎投烈宗艦中士卒驚撓失措章引
弓射殺數人持巨斧擊鈎鈎盡折鐵纜無所施
延昌退走越日薄其城城中人隱望樓指烈宗
罵語極穢烈宗慚甚不敢視左右章伏舩樓
中射罵者應弦皆倒舟兵乘勝鼓譟欲登時清

遠峽北水暴漲廣州糧運中絕延昌父光稠又
擁衆來援烈宗遇戰屢敗乃班師延昌開城襲
其後章勸烈宗捨舟由陸行士卒不成列烈宗
馬斃章卽以己騎授之而徒行爲殿韶兵望見
不敢逼表遷封州刺史充左右街使高祖稱號
命典禁衛諸軍白龍末楚人舉舟師來攻圍封
州城州兵出戰敗於賀江溺死者千人事聞高
祖遣章領神弩軍三千戰艦百艘赴援章至賀

江沉鐵絙水中兩岸作巨輪以挽絙築長堤隱
之預伏壯士堤中章駕輕舟逆戰佯敗楚人以
爲怯逐入堤中壯士挽輪舉絙楚艦不能進退
乃以強弩夾水對射盡殲楚兵圍解就遷封州
團練使章驍勇善戰行軍每合古法爲一時名
將子五人俱至中郎將豪俠任氣所爲多不軌
世號五郎將章老不能教會有告其謀逆者逮
下獄皆殺之廷議以章屢立戰功得不坐愧不

自安抑鬱成疾大有十年卒

梁克貞不知其所自起事高祖有將畧先是交
州曲承美自其父顥已據有其地至承美始受
梁節鉞高祖稱帝承美常斥爲僭僞抗不賓服
高祖積不平之大有中遣克貞與李守鄴出兵
攻拔其城執承美獻俘於朝又使人占城占城
在西南海中與真蠟爲隣多產水兕山羊犀角
孔雀自前世未嘗通中國高祖聞其實貨充積

至是遣克貞潛赴掠之克貞航海至其國賚以兵威載寶而還自是海外皆懾服久之交州牙將皎公羨殺節度使楊廷藝而據其眾廷藝故將吳權發兵爭之公羨來乞援師高祖使交王洪操赴救以克貞爲前部敗歸語詳洪操傳守鄜亦有勇力善戰陣交州之役高祖命克貞統軍而以守鄜爲副協力進攻承美旣被俘獲師旋與克貞同受上賞焉

程寶未詳其家世官至承旨高祖旣命梁克貞等攻破交州俘曲承美以李進爲刺史留兵守備明年愛州將楊廷藝養假子三千人欲圖交州進已偵知其事廷藝恐其聞於高祖不得志陰使以賂遺進進受之遂匿不以聞廷藝潛舉兵由黃江口來犯圍交州進始倉皇入報高祖亟遣寶統軍赴援甫及交境進已先棄城遁廷藝方據城堅守寶懼無功卽鼓眾薄城門廷藝

引軍出戰會寶兵遠來疲乏大敗寶猶力戰爲
廷藝所殺時有孫德成者有氣力然性遲重數
從高祖出兵戰功頗亞於寶大有中使將兵侵
楚蒙州分兵掠桂州楚文昭王以其弟希廣權
知軍府事自帥步騎五千屯桂州以備德成懼
引兵自蒙州歸尋卒

王宏不詳其家世少穎悟工爲詩賦乾亨中第
進士官翰林學士承旨珥筆左右被寵最渥高
祖新建南宮明年有白虹入宮之三清殿中羣
臣咸以爲災異中外詢詢高祖亦內憂疑不自
適宏思有以悅之乃改白虹爲白龍作白龍見
賦中述天降靈物爲國家受命之符稱頌備至
奏進高祖疑慮果釋大加褒美賞予特厚卽下
詔改元白龍旣而昭陽殿成又獻賦美之文采
華麗辭旨暢洽亦傳誦一時

王詡咸寧人喜爲詩賦乾亨初舉進士拜中書

舍人未幾白虹見南宮翰林學士王宏揣知高祖疑懼改爲白龍賦獻於廷果大稱旨詔繼進白龍頌詞條華燦時稱雙絕白龍改元長和遣使來求婚致朱鬃白馬詔爲賦上之大有七年昭陽殿成詞臣多獻賦爲頌咸推詔爲冠傳誦他國故事每遇廷臣文字奏進必厚頒賞賚是時賜予稍緩詔揚言曰吾賦字字作金聲何受賜之晚也其自負多類此同時有陳光父者亦

擅賦名雅尙詞藻乾亨中文德殿成獻賦高祖極稱賞之賜珍珠數斤

梁嵩潯州桂平人少好學善聲律富有文藻所居縣北百六十里有山曰閭石峯巒競秀如列旌嵩選勝得之意大愜築室讀書其中所學益進舉白龍元年進士第一遷翰林學士時高祖喜用酷刑一方之人若據烘爐岌岌不可終日嵩竊憂懼不復求仕進乞謝職歸養母因獻倚

門望子賦語極懇摯有云盈庭之護草徒榮滿
眼之蘆花自落楊朱陌上蕭條而恨淚潛潛漢
武臺邊宛轉而殘霞漠漠既進上高祖覽而憐
之聽其去臨行厚加賜賚皆謝不受獨請蠲本
州一歲丁賦從之嵩歸里後常肆意山水一日
乘白馬出遊東壕墟過渡溺死葬縣之麒麟山
州人感其舊德爲立廟歲祠不絕先是嵩登高
第鄉黨以爲榮更其鄉名曰鵬化里曰折桂曰

龍街云

簡文會咸寧人幼卽穎異銳意績學喜讀書工
爲詩章性尤耿介乾亨中高祖用楊洞潛議首
開進士科如唐故事擢文會第一累官尙書右
丞中宗弒立峻刑法以示威諸王相繼遭慘戮
每醉後輒暴怒莫可制左右侍者皆得罪文會
切諫忤旨謫正州刺史到部潔已愛民一切利
弊靡不盡心規畫視民事如其家循聲大著未

幾卒官所居鄉曰魁崗堡里第旁有井人號狀元井

鍾允章其先邕州宣化人徙家番禺素淹博能文辭高祖時設科取士舉進士及第累遷中書舍人中宗卽祚尤以文字爲所知凡誥敕碑記及朝廷一切應撰文字多使屬草允章文思敏捷援筆立成詞藻燦漫每撰進無不稱旨由是聲華籍甚諸國皆耳熟其名嘗扈蹕羅浮山鹿

制爲詩中宗大加褒賞目爲倚馬才又從幸英州盤龍石室歸命撰雲華御室記選詞徵義甚爲文士所稱尋拜工部郎中知制誥乾和中使楚求婚楚不許允章還報中宗怒問曰馬公復能經畧南土乎允章奏曰方今希廣新立希慕起兵武陵兄弟相爭亡於不暇安能有餘力及我願陛下選將勵兵乘其隙而圖之必得志機不可失也中宗曰然希廣懦而吝嗇其士卒忘

戰日久此吾進取之秋也遂決意用兵遣招討使吳懷恩等帥師便宜行事所至克捷不數年間先後拔其賀昭蒙桂宜連梧嚴富柳龔象柳等十三州之地以允章首建議恩遇愈隆頃之有司言允章名儒宜爲儲君輔導遂承命傅東宮已而中宗晏駕後主嗣帝位推恩舊學頗致禮遇遷尙書右丞參政事允章雖以文學結主知然爲人最耿直不畏權要且性慙不善作隱

語先是中宗時宦官林延遇等已預朝政至後主信任尤專內外事咸使裁決朝臣但備員數允章素深嫉其所爲至是進位知政職事皆爲所侵不令預參機密意益不平乃毅然抗疏請誅亂法宦官數人以正綱紀後主不從羣閣聞愈惡之密謀傾陷必欲致之死而未得其間會後主將祀園邱前三日允章率禮官登壇安設神位偶四顧指揮內侍監許彥真望見曰此殆

謀反也卽帶劔升壇允章叱使下彥真馳入宮告允章將於郊祀日作亂反形已露請急付廷尉又預約其黨龔澄樞李托等證成之後主曰允章爲朕藩府舊僚朕素待之厚豈肯背朕反耶澄樞等合詞謂彥真言信乃詔收允章繫含章樓下禮部尙書薛用丕與羣閹窮按其獄刑酷不可忍因誣服詔殺允章暴其尸并收二子邕昌族誅之是日天色慘淡道路聞者皆以允

章忠鯁獲罪相與太息稱其冤有掩泣涕下者逾數年彥真謀反伏誅始收葬焉弟有章自有傳薛用丕大寶初爲禮部尙書與允章友善彥真告允章謀叛用丕心憐其冤思爲平反而宦官輩輒先雜治之因不能救用丕揣宦者意知必不免乘間私以告允章允章執用丕手曰老夫今日猶枕上肉耳分爲讎人所烹但恨邕昌幼不知吾冤及他日長公爲語之彥真聞之罵

日反賊欲使其子報讎耶復白後主曰允章實與二子共登壇潛有所禱故二子并及於禍

南漢書卷十一終

南漢書考異卷十一

順德梁廷枏章冉撰

蘓章傳

封州人

黃通志十國春秋皆不云何地人今從九國志

表遷封州刺史充左右街使就遷封州團練使封川志作左右衛使與十國春秋作街使

南漢書考

卷十一

一

異

異按南漢依唐上京制置街使封川志誤
春秋無遷封州刺史事今從九國志

梁克貞傳

遣梁克貞與李守鄜出兵攻拔其城

薛史交州土豪曲承美亦專據其地梁正
授旄鉞陟遣將李知順伐之執承美以獻
自是盡有嶺南地及聞錢鏐封吳越王恥
稱南海之號乃嘆曰中原多故誰爲真主

安能萬里梯航事僞庭乎梁貞明三年八
月乃潛號於廣州據此執承美在巖未稱
帝之前且承命伐交州者爲李知順與歐
史通鑑並異歐史通鑑皆云遣克貞守鄜
攻克交州無知順之名且事在大有三年
按歐史承美至南海巖登儀鳳樓受俘謂
承美曰公常以我爲僞庭今反縛何也承
美頓首謝乃赦之則事在稱帝後明矣

吳

孫德成傳

楚文昭王以其弟希廣權知軍府事自帥步騎
五千屯桂州以備

歐史止云攻蒙州不克無攻桂州及楚王
自引兵來援事按通鑑馬希杲有善政裴
仁煦言其收眾心希範疑之漢將孫德成
侵蒙桂二州希範命弟希廣權知軍府事
自將步騎如桂州希杲懼其母逆希範謝

曰希杲為治無狀煩陛下親涉險阻妾之
罪也希範曰吾久不見希杲聞其治行尤
異故來省之漢兵自蒙州引去徒希杲知
朗州據此是希範素疑希杲假禦南漢為
名親赴桂州以察其狀此來不專為南漢
也歐史闕書今從通鑑

王宏傳

作白龍見賦

南漢書考

卷十一

三

異

十國春秋白虹化爲白龍見三清殿宏爲
白虹化白龍賦上之按薛歐二史及通鑑
並云白龍見惟五國故事白虹入其僞三
清殿中王宏欲悅巖乃以白虹爲白龍見
上賦以賀之據此則當時實白虹入見宏
借虹爲龍改稱以賀非真虹能化龍也春
秋特誤會故事之文耳

王詡傳

詡職官分紀作翊今從十國春秋

梁嵩傳

潯州桂平人

明一統志作潯州平南人按舊唐書地理
志貞觀七年分置平南縣後自武林移龔
州治此方輿類纂平南縣隋爲武林縣地
唐貞觀七年析置今縣屬龔州尋爲州治
天寶初曰臨江郡乾元初復故南漢因之

異

明統志亦云貞觀中分置平南縣後自武
林移龔州治此領陽川武林隋建大同四
縣宋省四縣入平南據此則南漢時平南
隸龔州不隸潯州也十國春秋地理表既
云潯州領平桂宣化二縣而嵩傳復依明
統志作潯州平南人誤

州之桂平縣北六十里有山曰閬石

十國春秋地理表潯州領縣二一日平桂

按明一統志作桂平春秋誤

陳光父傳

南漢春秋止作光今從十國春秋

鍾允章傳

其先邕州宣化人

十國春秋云其先邕州人徙家番禺註云
一日宣化人廣州鄉賢傳亦止云邕州人
按舊唐書地理志宣化屬於邕州方輿類

異

纂云貞觀六年改晉州曰邕州五代時屬南漢則允章時宣化已屬邕州蓋邕之宣化人也

不數年間拔賀昭蒙桂等十三州之地

歐史九國志皆云取梧桂諸州爲乾和六年事按是年允章使楚晟用允章言命吳懷恩等出師伐楚其年十二月拔賀昭二州九年十一月懷恩等拔蒙桂宜連梧嚴

富柳龔象等州十年命潘崇徹攻克柳州凡前後得楚地十三州歐史云七州九國志云半歲間得六州並誤也詳見中宗紀考異

乘間私以告允章允章曰老夫今日猶杙上肉耳分爲讎人所烹

歐史允章與用丕有舊因泣下曰吾今無罪自誣以死固無恨無用丕私告允章事

異

所紀九章語亦與通鑑異今從通鑑

南漢書考異卷十一終

南漢書卷十二

順德梁廷枏章再撰

列傳第六

諸臣傳四

萬何蕭侯王盧陳李吳謝列傳

萬景忻亡其家世鄉里少以驍勇聞高祖稱號
拔為牙校大有時屢從征討積功至指揮使殤
帝初嗣位有妖賊張遇賢聚眾起正州攻掠近

南漢書

卷十二

海諸州縣殲帝命越王洪昌循王洪杲同率兵往討與賊遇戰半日賊圍益衆二王困不可出時景忻隸戲下與指揮使陳道庠挾弓弩馳馬畧其陣陣堅不可攻復奮劍大呼殺賊突圍入殺十餘人賊衆披靡以大楯蒙二王翼之走圍潰得脫賊遂解去應乾改元復出兵攻循州與遇賢戰敗之克復循州逐遇賢遇賢逾嶺不復南事聞有詔褒獎

何詞不得其鄉里累官至宮苑使乾亨末唐莊宗滅梁卽帝位兵威頗震高祖聞之恐遂有包并四方志欲遣使入汴假通聘好因便覘其虛實選難其人廷臣咸薦詞嫻言對當不爲國辱卽命以原官往奉書稱大漢國主致上大唐皇帝時莊宗在魏都詞至召見於鄴宮與講鈞禮不少屈莊宗問高祖近事詞具言之且云本國聞陛下新登大寶仰慕聲靈已發使臣大陳物

貢期以今秋必至先遣下臣肅將賀悃莊宗信
之禮成辭歸語高祖曰唐主自移梁鼎滿假而
驕近復寵嬖諸伶荒淫無度其朝章已紊行自
救不暇何能以道御遠方固知其無足畏也高
祖大悅遂不復與唐通逾年莊宗被弑人皆服
詞之先知焉同時有何瑱劉瑋鄭勣蕭規公孫
惠滕紹英者皆一時皇華之選嶺北諸藩歲時
通好多賴其力瑱仕高祖爲左僕射美容觀風

姿玉立饒有文采大有初吳越武肅王薨瑱承
命如吳越致祭言論風發大得嗣王心劉瑋乾
亨初客省使高祖稱帝命瑋告卽位於吳且勸
吳王隆演稱大號蒙厚賚而歸勣大有時官都
官郎中南唐烈祖受吳禪遣使來通好自後聘
問不絕時烈祖以誕生日爲仁壽節勣銜命往
南唐致賀逾年歸終於其官蕭規逸其職官鄉
里高祖崩殤帝欲續隣好使告哀於南唐頗得

使臣禮公孫惠事高祖爲法物使光天元年繼
規如南唐告卽位規先以六月至逾兩月惠亦
至同時兩使南唐人盛稱殤帝能篤睦隣之誼
云滕紹英亦失其官爵先是南唐烈祖仁壽節
高祖歲遣使往賀殤帝嗣位將修故事擇能而
使紹英遂膺是選

蕭益梁昭明太子之後先世皆顯宦多爲唐宰
輔曾祖悟仕至大理司直祖倣登進士第歷諫
議大夫積官兵部尙書尋以本官同平章事累
遷中書門下二侍郎左右僕射宏文館大學士
出爲嶺南節度使父廩進士擢第累遷尙書郎
免官侍父出鎮尋召爲中書舍人遷京兆尹高
祖以益家世清顯招致錄用大有中累官崇文
使時岐公羨與楊廷藝故將吳權相舉兵爭交
州公羨遣使致賄來乞師高祖將襲有其地使
萬王洪操統衆救公羨自將兵駐海門爲聲援

問策於益益曰今霖雨積旬海道險遠吳權桀
黠未可輕視大軍當持重多用鄉導然後可進
否則兵未戢也高祖不聽權果殺公羨引舟師
來誘洪操戰於海口洪操全軍沒死高祖始思
益言大悔收衆急還無何高祖病與右僕射王
翽謀先出殤帝中宗於外鎮而後傳位越王洪
昌計定欲降制會益入問疾高祖具以翽議告
且令更籌之益諫曰立嫡以長古今通制違之

而立少者則長者必爭况兩王居外兵力易集
若反兵內向何以禦之恐國家禍不旋踵矣高
祖乃止

侯融未詳其世系事高祖官著作郎爲人慷慨
立朝能直言高祖初年出兵悉平諸寨諸州向
不臣服者以次削平之頗以善兵自負稱號後
益得志將舉兵北伐融乘間言嶺南久被征戰
防百姓耕耨苦不聊生陛下建大號者定疆宇

正宜弭兵息民奠安南土今窮兵黷武日事戰
爭非太平所宜有也高祖稍用其言故乾亨初
數年間不復衽席金革無何融卒交州之役交
王洪操遇害高祖旣深痛其子之死且以兵敗
自愧追咎融言謂戎事不振實融所致詔剖棺
暴其尸

王翻逸其鄉里大有末積官至右僕射兼西院
御史高祖不豫當立儲以殤帝中宗年雖長而
性皆驕恣獨越王洪昌孝謹有識頗與己類欲
遂立洪昌意向猶豫召翻議翻力贊成之且勸
高祖亟出殤帝鎮邕州中宗鎮容州俟其行而
後下詔高祖是其言將有制書爲蕭益力諫事
遂寢中宗初元遷左僕射乾和二年洪昌旣被
殺追論翻建議廢長之罪貶爲英州刺史未至
使人要於路殺之

盧膺不知所自起大有時累官工部侍郎初馬

后有女弟字吳越王弟新安侯傳璠蚤寡馬后
既歿高祖欲續楚舊姻將求爲繼后先請於楚
文昭王王既內主其事而慮吳越不許約高祖
自遣使往求之楚亦使其中軍使歐陽練偕行
以期必濟至是膺以原職權攝太尉與尙儀謝
宜清尙衣高素清等俱至吳越謁文穆王備陳
高祖意王召馬氏商之馬氏具言久甘守節故
夫義重不忍他適因以死誓文穆王從其志竟

不遣膺知不可奪辭歸中宗襲位拜中書侍郎
同平章事乾和十五年卒官

陳偃亡其世序事高祖厯官戶部侍郎乾和初
越王洪昌輔政有賢稱中宗恐其得衆計殺之
於是更選揆席廷臣咸推偃遂加同平章事偃
庸懦無能居相位絕少建白僅備員而已

李璵不知何地人事中宗爲給事中交州吳權
既敗死交王洪操自爲節度傅子昌岌皆負固

不廷至是昌岌死其弟昌文使來稱臣中宗假以靜海節鎮遣璵持旌節招令入朝行抵白州會昌文中變遽使人止之曰海寇竊發往來道阻恐有行李之虞璵信之遂還後數年卒

吳珣鄉里已逸積官至巨象指揮使爲人有勇畧善出奇計乾和中中宗乘楚王兄弟爭國之釁思襲有其地使珣及招討使吳懷恩同攻賀州城旣陷而後楚將徐知新任廷暉督兵來救

珣與懷恩謀先使人於城外鑿大窋以竹箔覆蔽傳土其上如平地設機穴中待之知新等引衆逼城近珣潛募人入穴發機楚兵盡墮相踐踏死者不可勝算知新僅以身免懷恩分兵攻昭州珣復引所部擾掠全州邊乃還

謝貫少有膽勇喜麤戰戰功稍遜吳珣而皆以善戰稱於時乾和中與內侍省丞潘崇徹攻楚郴州時南唐武安節度邊鎬奉其國命駐湖湘

趣馬氏歸江南聞報發兵來爭崇徹迎戰貫策
兵爲應南唐大敗遂克郴州康崇保乾和中爲
步將從貫攻郴州南唐救兵至義章崇保與崇
徹分兵爲兩翼擊敗之俘獲無算悉滅其一臂
縱之去

南漢書卷之十二終

南漢書考異卷十二

順德梁廷枏章冉撰

萬景忻傳

挾弓弩馳馬畧其陣復奮劍大呼殺賊十餘人
賊衆披靡以大楯翼二王得脫

通鑑止云力戰救之九國志劉洪杲傳裨
將萬景忻等蒙以大楯翼二王以出陳道
庠傳道庠與景忻等奮劍大呼殺十餘人

異

不載蒙以大楯事十國春秋與陳道庠挾
持弓弩馳馬畧陣力救二王無奮劍呼殺
賊及蒙大楯事諸書互有詳畧今悉爲補
入

何詞傳

欲遣使入汴假通聘好因便覘其虛實

通鑑漢主聞唐滅梁而懼遣何詞入貢且
覘中國強弱吳越備史亦云入貢京師惟

薛史書來聘按薛史云稱大漢國主致書
上大唐皇帝莊宗召問南海事狀具言本
國已發使臣陳貢物今秋卽至據此則詞
出使時未具貢物往不當書入貢矣又按
通鑑同光元年唐使吳稱詔吳人不受唐
帝易其書用敵國禮曰大唐皇帝致書吳
國主吳人復書稱大吳國主上大唐皇帝
今南漢書詞稱謂與吳同是用敵國鈞禮

異

當書聘不當書入貢矣十國春秋南漢紀
依通鑑云入貢誤蓋通鑑與備史皆尊中
朝書法應爾春秋各紀一國自有內詞且
更當核其實也又薛史稱大漢國王王當
作主蓋文偶缺耳

公孫惠傳

惠十國春秋作孫惠今從陸氏南唐書

蕭益傳

祖倣以本官同平章事遷左右僕射

通鑑天福三年註云蕭倣相唐懿宗新唐
書宰相世系表倣字思遵相僖宗按新書
咸通十四年七月懿宗崩僖宗立十月以
倣同中書門下平章事則倣實相僖宗不
相懿宗也今從新書又新書尙書左僕射
蕭倣爲中書侍郎同中書門下平章事今
按舊唐書倣傳咸通末復爲兵部尙書判

異

度支尋以本官同平章事累遷中書門下
二侍郎兼戶部兵部尚書遷左右僕射是
遷僕射在同平章後與新書異今從舊書
父廩累遷尚書郎召為中書舍人遷京兆尹

新唐書宰相世系表廩字富侯給事中按
舊唐書廩傳止云咸通三年進士擢第累
遷尚書郎乾符中以父倣鎮南海免官侍
行中和中徵為中書舍人遷京兆尹固不

云終於給事也今從舊書

大有中累官崇文使

新唐書宰相世系表益商州團練推官按
歐史通鑑皆止云官崇文使是時南漢諸
州地無名商者或益未仕南漢以前曾官
是職諸書無考今姑闕疑又十國春秋大
有初官崇文使按益為崇文使始見於通
鑑天福三年諫救交州事是年即南漢大

異

有十一年歐史亦繫於大有十年後春秋云大有初即官崇文使不知何據也

王翺傳

使人要於路殺之

通鑑云未至賜死內外皆懼不自保十國春秋從之歐史云使人殺之於路按當時追論立少之罪已遭貶謫復於半道遽賜之死未免顯以淫刑示人矣晁雖克暴似

不出此釋歐史之文當如使盜殺洪昌故智蓋必致之死而不欲自居殺之之名也

盧膺傳

官工部侍郎

吳越備史番禺劉龔遣偽攝太尉工部侍郎盧膺來逆馬氏為繼室通鑑顯德四年南漢中書侍郎同平章事盧膺卒膺姓名官偕僅見於此曝書亭集歲在壬申重遊

南漢書考

卷十二

五

異

嶺表南海陳元孝飯子光孝寺語予劉龔
墓葬番禺治東二十里崇禎丙子土人發
其墓有碑一具書翰林學士知制誥正議
大夫尙書左丞上紫金帑臣盧應奉勅撰
文曰維大有十五年歲次壬寅四月甲寅
朔念四日丁丑高祖天皇大帝崩於正寢
越光天元年五月癸未朔十四日丙申遷
神於康陵禮也云云亡友吳志伊撰十國

春秋盧應更作膺謂事龔爲工部侍郎大
有中加太尉中宗時拜中書侍郎同平章
事銜名不合惜其已逝未得此異聞也據
此則朱氏固以爲膺卽應而疑十國春秋
誤加改易矣又王士正皇華紀聞所紀盧
應下一字乃初字粵東金石畧引廣東新
語云所記應下一字乃勅字兩書俱無奉
字是其名一作應初一作應勅碑以崇正

丙子出土至彝尊遊粵時中間裁隔五十七年撰新語者又嶺南土著而所記互異已若此蓋朱氏既得之口述而陳氏又出自記憶均非目覩碑文則碑內之姓名尙未確定又安能據碑而疑春秋之錯更乎且據備史通鑑膺之歷官原與碑異或疑碑內未題全銜然南漢職官多依唐制今考舊唐書志工部侍郎與尙書右丞皆第

四品下階則兩銜對品究以何者爲所遷階乎知撰碑者別爲一人無疑矣又春秋稱膺才藻俊茂酷有體裁二語他無所據當暗指撰康陵碑而言似吳氏亦嘗疑兩人卽一人特未敢懸斷耳

馬氏有女弟字傳璫蚤寡

十國春秋傳璫傳云天寶十四年娶楚武穆王女馬氏未幾傳璫死按吳越備史膺

異

如吳越逆馬氏在天福六年辛丑逆推至天寶十四年已閱百八十六年矣春秋誤

南漢書考異卷十二終

南漢書卷十三

順德梁廷枏章冉撰

列傳第七

諸臣傳五

二劉鍾暨陸雷陳伍盧李植蕭王馮胡列傳

劉傳失其家世大有末官循州刺史州境與正州接壤殤帝初元羣盜四起各擁眾無所統制共推博羅縣吏張遇賢為帥圍循州時烏合之

南漢書

卷十三

眾不下數萬事起倉卒傳兵少不能禦城陷死
之

劉博古不知其鄉里中宗時歷官潯州刺史能
恤民疾苦多惠政部民愛之若所自出州有陸
公井博古嘗植橘其旁潯人稱曰橘井以誌舊
德博古既沒猶共指爲劉公遺澤不忍斬刈云
有曾芳者不知何時人官程鄉令爲政清簡因
民苦瘴癘給藥濟之求者踵相接芳乃以大囊

盛藥投井中令民汲水飲皆愈程鄉人名其井
曰曾井芳沒立祠井旁病者禱之飲井水亦愈
謝傑亦不知何時人官高州刺史先是州多虎
患夜入城郭噬人民爭訴之傑沐浴詣城隍祠
舉杯祝神曰愚民何辜而虎暴之此刺史無德
化所致願虎但食刺史無傷民祝畢屏去左右
獨宿祠庭夜漏三下祠東南隅忽有物如雷吼
良久乃止旦見數虎皆斃

鍾有章尙書左丞允章弟也少有文藻與允章
齊名累官翰林學士中書舍人後主初嗣位於
羅浮山建天華宮又立雲華閣兩門左爲含陽
右爲起雲其亭有甘露羽蓋諸名皆極宏麗命
有章爲文記之稱大手著作不半年允章被誣
伏法遂有滅門之禍時有章已先卒故不及見
暨彥贇家世未詳乾和中累官巨艦指揮使時
中宗尙奢華離宮宴幸耗費不貲正供所入日

就支絀因陰遣彥贇率兵士入海窺商舶重載
者詐爲盜劫其金帛歸獻充益無名之費內侍
省丞潘崇徹旣克郴州使彥贇戍其地捍衛邊
境悉盡心力頗以方畧聞於時大寶七年宋將
丁德裕等來圍郴城彥贇出戰不利城陷爲宋
兵所殺

陸光圖四會人祖東升初爲烈宗裨將守端州
高祖稱帝遷兵部侍郎父昂累官桂州刺史領

靜江軍節度使光圖胄望顯貴少承家學讀書
識大義歷官至閤門副使後主方寵任閤宦百
官多求人知內待省光圖以爲辱力請外任後
主知其意不足於閤宦惡之欲處以極邊惡地
卽除郴州刺史光圖至郴出俸錢周恤窮民招
輯逃亡士卒日加訓練四境遂安謐無寇警郴
民呼爲陸父大寶七年宋師南來抵郴鄙光圖
遣兵柵騎田嶺會雨漲黃溪水溢宋將丁德裕

潘美等乘漲卒至柵爲所破光圖與指揮使暨
彥贊力戰大敗被執抗罵不少屈遂與俱死時
有龐姓者亡其名爲光圖舊所屬吏嘗因奏事
見後主後主識之及降宋後過騎田嶺龐迎謁
後主驚曰若胡在此對曰大王之國非有萬里
之遙邊境不過至此極矣先是後主意郴州遠
在窮荒之北罰光圖居之故吏言如此

雷嶽不知何地人少績學能詞章尤工駢偶文

乾和末厯官御書院給事才名雅爲中宗所知
朝廷有大著作多出其手先是韶州證真寺僧
文偃自高祖時屢加欽重至是死其徒將葬之
乞銘中宗允所請命嶽撰身塔銘詞極宏贍抄
誦者踵門一時紙貴

陳守中里居家世不可考事後主官西御院使
集賢學士承旨遷大中大夫行左諫議大夫知
太僕寺事上柱國賜紫金魚袋守中博覽羣籍

富贍詞翰著作爲當時詞臣之冠生平最精通
內典大寶七年昇雲門山證真寺爲大覺禪寺
命撰碑記多至三千餘言末云臣才異披沙學
同鑄水虔膺鳳旨紀實性以難周愧匪雄詞勒
貞珉於不朽撰成進上後主大喜卽命以原文
鐫於石厚予賞賚不知其所終

伍彥柔不詳其官大寶末宋潘美等圍賀州廷
議起故將潘崇徹統兵拒之崇徹辭不受詔後

主怒曰伍彥柔豈無方畧耶何必崇徹也遂拜
彥柔爲將使急率兵赴援美等聞彥柔將至先
退二十里以奇兵潛伏南鄉岸爲三覆以待之
彥柔夜至不知是計泊南鄉艤舟岸側遲明挾
彈登岸踞胡牀左右指揮伏兵卒發彥柔歟大
亂所將軍五萬死者十七八彥柔被擒死焉
盧收事後主官至招討使美等攻連州後主遣
收統兵拒騎田嶺嶺爲邊隘要地收晝夜戒嚴

鼓角聲不絕宋師挑戰多傷敗久不能過時李
廷珙已降宋引兵出春陵屯平陽去嶺百餘里
聞收堅壁禦守無計取勝思收所領將士多已
舊部下說之必動策馬直至嶺前招之兵果謹
諫多相繼走宋軍降收知不可守乃燒壘潛遁
以餘衆退保清遠連州遂陷

李承渥不知所自起事後主數有戰功大寶十
三年賀昭桂連諸州相繼爲宋將潘美等所陷

後主意四州本楚舊地宋既克復當卽旋師已
聞宋師長驅指韶州始懼命承渥爲都統將十
餘萬眾列陣韶之蓮花峯下先是承渥嘗教象
爲陣每象必十數人各操兵刃坐象背凡戰則
先驅象佈陣前以壯軍威至是列象待戰美等
盡索弩射象象不能抵相率奔躩乘象兵士皆
傾側墮地自相踐踏步軍蹂躪死者不可勝算
美等率眾諫逐之遂大潰承渥遁歸韶州自此

不能守辛延偃累官韶州刺史承渥敗美等入
韶城被執拘留宋軍中見軍盛知不復可拒遣
人間道歸勸後主詣軍前迎降後主意動召諸
臣謀爲內太師李托所阻卿文遠事後主官至
諫議大夫出視師韶州承渥與美等戰文遠在
圍城中與辛延渥協力固守承渥既敗走宋師
乘勝攻陷文遠被擒

植廷曉字朗伯東莞人爲將有勇畧見後主酷

虐日甚解去兵柄大寶十三年宋師既破李承
渥拔韶州後主顧諸將無可使者始起用廷曉
命與郭崇岳統眾六萬屯馬逕列柵待敵明年
宋將潘美等陷英雄二州進次瀧頭後主遣使
請和美等挾使者直逼馬逕前鋒來挑戰廷曉
將發兵擊之崇岳屢言不可廷曉曰北軍乘席
捲之勢其鋒不可當也我士旅雖眾然皆傷瘵
之餘今不驅策而前亦坐受其斃矣乃自領兵
握水而陣約崇岳爲後殿使禦宋軍奔衝美等
濟水廷曉迎擊力戰不勝遂死焉

蕭灌事後主厯官右僕射大寶末年正月宋將
潘美等克雄州進屯柵口砦於雙女山下後主
欲逃入海不果乃遣灌偕卓惟休奉表詣宋軍
求降潘美召諭以太祖意曰奉天子明詔謂彼
能戰則與之戰不能戰則勸之守不能守則諭
之降不能降則死不能死則亡非此五者他不

得受因留灌惟休不遣未幾隨宋殿直冉彥袞
入汴授太子中允卒惟休大寶時官中書舍人
與灌並使宋軍乞降被留同送至汴授太僕寺
丞

王珪大寶末官諫議大夫爲人性方直見宦官
輩用事素惡之宋將潘美兵日逼會衛兵與宦
者合謀盜金寶妃嬪走後主皇迫無計遣珪詣
宋軍通好使用隣國禮旣行後主料珪必不得

所請復遣蕭灌奉表稱臣乞降美等留灌遣珪
還師亦隨至國亡後從主入宋太祖責問龔
澄樞等降戰翻覆及縱火焚府庫事澄樞等俯
首無語時珪在側數之曰昔在故國機務並爾
輩所專火又自內中起今天子遣使按問尙不
自承欲推過何人遂直前唾之手批其頰澄樞
等乃引服

馮邴其先始平人曾祖禧唐末官廣州遭黃巢

亂不得還遂註籍焉烈宗接禮中原人士禧精術數策名嶺表逮邠祖父三世並爲日御至邠夙承家學世其職國亡從後主至汴京授保章正子元字道宗少聰慧七歲方讀易母夜夢異人以紺蓮華與元吞之且曰善讀此後必貴顯已而從父歸宋由大中祥符元年進士累官翰林學士轉侍讀遷戶部侍郎卒事具宋史胡賓王字時賢韶州曲江人少卽肆力問學流

覽極博馳聲遠近喜中宿峽山水奇勝遠絕人境讀書其中經史疑義皆有發揮已而第進士甲科累官中書舍人知制誥時後主淫虐不道賓王逆知運數不能久棄官歸里著南漢國史自烈祖至後主爲五主傳楊洞潛至陸光圖等三十三人爲純臣傳又有具臣亂臣宦官女謁諸傳合十二卷入宋後易名曰劉氏興亡錄上之以明經授著作郎會詔有官者得與科試遂

登咸平庚子進士第以翰林學士致仕卒於家
賓王爲人樂易俊爽操行謹慎不苟言笑居官
憂國奉公務盡其職守鄉黨中有貧寡者必周
恤之晚於縣東二十里毬岡下構堂講書旁置
濯纓亭几案皆石爲之題有水向石邊流出冷
風從花裏過來香之語其風趣多類此又好表
章同里前哲遺文唐國子生邵謁有詩集爲序
而行於世卒後人號所居曰學士里

